

医宗金鉴

(卷二十六~三十三)

删补名医方论

清·吴谦等编

内 容 提 要

《医宗金鉴》刊行于清乾隆四年（公元 1739 年），是当时清政府编辑的医学丛书。原书共 90 卷，本书系其一部分，原书卷次 26～33 卷。

本书内容，载列了汉、唐、元、明以来的处方二百多个，按其性质分为：温、清、消、补等类。每方先列主治病症、药味剂量、制法服法，然后附以清以前医学名家的论说，作为注解，以说明方药配合、药理作用以及加减变化等问题。又因本书所有引据，有补有删，以达到简单明了的效果，故称：删补名医方论。

本书对学习、研究中医治疗方法，都有参考价值。

删补名医方论目录

〔医宗金鉴 卷二十六〕

删补名医方论 卷一..... 7

独参汤(7) 参附汤(8) 生脉饮(9) 保元汤(9)
 四君子汤 附:七味白术散 五味异功散 六君子汤 香
 砂六君子汤(10) 香砂六君子汤(11) 当归补血汤(12)
 佛手散(12) 四物汤(13) 圣愈汤(14) 地骨皮
 饮(15) 犀角地黄汤(15) 四生丸(16) 当归六黄
 汤(16) 黄耆建中汤(17) 双和饮(18) 人参养荣
 汤(18) 归脾汤(19) 妙香散(20) 天王补心丹(20)
 酸枣仁汤(21) 珠砂安神丸(22)

〔医宗金鉴 卷二十七〕

删补名医方论 卷二.....23

补中益气汤(23) 升阳益胃汤(24) 升阳散火汤(25)
 补脾胃泻阴火升阳汤(26) 清暑益气汤(26) 清燥
 汤(27) 白术附子汤(28) 葛花解醒汤(28) 平胃
 散(29) 枳术丸(30) 资生丸(30) 六味地黄丸 附:
 桂附地黄丸 知柏地黄丸(31) 八味地黄丸(33) 资生
 肾气丸(34) 大补阴丸(35) 封髓丹(36) 虎潜
 丸(37) 滋肾丸(38) 琼玉膏(39) 龟鹿二仙胶(39)
 四神丸 附:二神丸 五味子散(40)

〔医宗金鉴 卷二十八〕

删补名医方论 卷三.....42

续命汤(42) 三生饮(42) 稀涎千缗汤(43) 秦艽升麻汤(44) 防风黄耆汤(44) 玉屏风散(45) 黄耆五物汤(45) 羌活愈风汤(46) 清热化痰汤(47) 防风通圣散(48) 九味羌活汤(49) 活人败毒散(49) 柴葛解肌汤(50) 升麻葛根汤(51) 参苏饮(52) 藿香正气散(52) 神术汤(53) 麻黄加术汤(53) 桂枝附子汤(54) 栝蒌桂枝汤(54) 水解散(55) 二圣救苦丹(55) 天水散(55) 香薷饮(56)

〔医宗金鉴 卷二十九〕

删补名医方论 卷四.....58

黄连解毒汤(58) 三黄汤(59) 二黄汤(59) 三黄石膏汤(59) 凉膈散(60) 竹叶黄耆汤(61) 清胃散(62) 导赤散(62) 五淋散(63) 八正散(63) 逍遥散(64) 龙胆泻肝汤(64) 左金丸(65) 泻青丸(65) 当归龙荟丸(66) 越婢加半夏汤(67) 小青龙加石膏汤(67) 清燥救肺汤(67) 麦门冬汤(69) 人参清肺汤(69) 人参定喘汤(69) 人参泻肺汤(70) 泻白散(70) 阿胶散(71) 二陈汤(71) 温胆汤(72) 小半夏汤(72) 小半夏加茯苓汤(73) 外台茯苓饮(73)

〔医宗金鉴 卷三十〕

删补名医方论 卷五.....74

礞石滚痰丸(74) 指迷茯苓丸(74) 金匱枳术汤(75)

桂苓甘术汤(75) 疏凿饮子(76) 葶苈大枣泻肺汤(77) 苏葶定喘丸(78) 舟车神祐丸(78) 实脾饮(79) 清脾饮(80) 芍药汤(80) 温脾汤(81) 大黄附子汤(81) 越鞠汤丸(82) 四磨饮(82) 备急丸(83) 磁珠丸(84) 石斛夜光丸(85) 洗刀散(86) 失笑散(87) 独圣散(88) 大黄蛰虫丸(88) 仙方活命饮(89) 托里消毒散(90)

〔医宗金鉴 卷三十一〕

删补名医方论 卷六.....91

桂枝汤(91) 麻黄汤(92) 大青龙汤(93) 小青龙汤(94) 葛根汤(95) 桂枝麻黄各半汤(97) 桂枝二麻黄一汤(97) 桂枝二越婢一汤(98) 越婢汤(99) 麻黄杏仁甘草石膏汤(100) 麻黄附子细辛汤(101) 桂枝加附子汤(102) 芍药甘草附子汤(102) 桂枝甘草汤(103) 桂枝加芍药加大黄汤(103) 桂枝加芍药汤(103) 桂枝加大黄汤(103) 小建中汤(104) 炙甘草汤(104) 桂枝人参汤(105) 葛根黄芩黄连汤(105) 白虎汤(106) 白虎加人参汤(107) 猪苓汤(107) 五苓散 附:茵陈五苓散(108) 桂枝汤去芍药加茯苓白术汤(109) 十枣汤(110)

〔医宗金鉴 卷三十二〕

删补名医方论 卷七..... 111

大承气汤(111) 小承气汤(111) 调胃承气汤(112) 更衣丸(113) 麻仁丸(113) 桃仁承气汤(114) 抵当汤并丸(114) 栀子豉汤 附:加減講湯(115) 瓜蒂散(116) 小陷胸汤(117) 大陷胸汤丸(118) 三

物白散(118) 大黄黄连泻心汤(119) 附子泻心汤(119) 甘草泻心汤(120) 生姜泻心汤(120) 半夏泻心汤(121) 旋复代赭石汤(121) 麻黄连轺赤小豆汤(122) 梔子柏皮汤(123) 茵陈蒿汤(123)

〔医宗金鉴 卷三十三〕

删补名医方论 卷八..... 125

小柴胡汤(125) 大柴胡汤(126) 柴胡桂枝汤(127)
黄芩汤(128) 黄连汤(128) 黄连阿胶汤(129) 埋中汤丸(129) 干姜附子汤(130) 茯苓四逆汤(131) 附子汤(132) 四逆汤(132) 通脉四逆汤(132) 白通汤(133) 白通加猪胆汁汤(134) 真武汤(134) 当归四逆汤(135) 当归四逆加吴茱萸生姜汤(135) 吴茱萸汤(136) 乌梅丸(137) 赤石脂禹余粮汤(138) 白头翁汤(138)

〔医宗金鉴 卷二十六〕

删补名医方论 卷一

古医方得人乃传，非人勿言。故扁鹊、仓公皆称禁方不轻授人，诚重之也。后汉张机著《伤寒杂病论》，始立众方，公之天下。故建安以前，苦于无方；元丰而后，虽有局方，漫无指归，不可为法。今博集《金匱》、《千金》、《外台》诸书及王好古、李杲、刘完素、朱震亨、张从政、薛己诸方之佳者，采录成编。然方论始于成无己，近代则有吴琨、李中梓、柯琴、汪昂诸家，于医方虽各有发明，但其间或有择焉未精、语焉未详者。复推其立方之意，综其简要，删繁补阙，归于明显，名之曰：删补名医方论，以昭示来兹云。

独参汤 治元气大虚，昏厥，脉微欲绝，及妇人崩产，脱血，血晕。

人参 分两随人、随证

须上拣者，浓煎顿服，待元气渐回，随证加减。

〔集注〕柯琴曰：一人而系一世之安危者，必重其权而专任之；一物而系一人之死生者，当大其服而独用之。故先哲于气几息、血将脱之证，独用人参二两，浓煎顿服，能挽回性命于瞬息之间，非他物所可代也。世之用者，恐或补住邪气，姑少少以试之，或加消耗之味以监制之，其权不重、力不专，人何赖以得生乎？如古方霹雳散、大补丸，皆用一物之长而取效最捷，于独参汤何疑耶！

〔按〕若病兼别因，则又当随机应变，于独参汤中或加熟附补阳而回厥逆，或加生地凉阴而止吐衄，或加黄耆固表之汗，或加当归救血之脱，或加姜汁以除呕吐，或加童便以止阴烦，或加茯苓令水化津生治消渴泄泻，或加黄连折火逆冲上治噤口毒痢。是乃相得相须以有成，亦何害其为独哉？如薛己治中风，加入参两许于三生饮中，以驾驭其邪，此真善用独参者矣。

参附汤 治阴阳气血暴脱等证。

人参 附子(制)

水煎服。

〔注〕先身而生，谓之先天；后身而生，谓之后天。先天之气在肾，是父母之所赋；后天之气在脾，是水谷之所化。先天之气为气之体，体主静，故子在胞中，赖母息以养生气，则神藏而机静；后天之气为气之用，用主动，故育形之后，资水谷以奉生身，则神发而运动。天人合德，二气互用。故后天之气得先天之气，则生生而不息；先天之气得后天之气，始化化而不穷也。若夫起居不慎则伤肾，肾伤则先天气虚矣。饮食不节则伤脾，脾伤则后天气虚矣。补后天之气无如人参，补先天之气无如附子，此参附汤之所由立也。二藏虚之微甚，参附量为君主。二药相须，用之得当，则能瞬息化气于乌有之乡，顷刻生阳于命门之内，方之最神捷者也。若表虚自汗，以附子易黄耆，名人参黄耆汤，补气兼止汗。失血阴亡，以附子易生地，名人参生地黄汤，固气兼救阴。寒湿厥汗，以人参易白术，名术附汤，除湿兼温里。阳虚厥汗，以人参易黄耆，名耆附汤，补阳兼固表。此皆参附汤之转换变化法也，医者扩而充之，不能尽述其妙。

生脉饮 治热伤元气，气短倦怠，口渴出汗。

人参 麦门冬 五味子

水煎服。

〔注〕经云：大气积于胸中，则肺主之。夫暑热伤肺，肺伤则气亦伤矣。故气短、倦怠而喘咳也。肺主皮毛，肺伤则失其卫护，故汗出也。热伤元气，气伤则不能生津，故口渴也。是方君人参以补气，即所以补肺。臣麦冬以清气，即所以清肺。佐五味以敛气，即所以敛肺。吴琨云：一补、一清、一敛，养气之道备矣。名曰生脉，以脉得气则充，失气则弱。李杲谓：夏月服生脉饮，加黄耆、甘草，名生脉保元汤，令人气力涌出；更加当归白芍，名人参饮子，治气虚喘咳，吐血衄血，亦虚火可补之例也。

保元汤 治男妇气虚之总方也。婴儿惊怯，痘家虚者，最宜。

黄耆三钱 人参二钱 甘草一钱 肉桂存夏二三分，

秋冬六七分

上四味，水煎服。

〔集注〕柯琴曰：昔东垣以此三味能泻火、补金、培土，为除烦热之圣药，镇小儿之惊，效如桴鼓。魏桂岩得之，以治痘家阳虚顶陷，血虚浆清，皮薄发痒，难灌难敛者，始终用之。以为血脱须补气，阳生则阴长，有起死回生之功，故名之为保元也。又少佐肉桂，分四时之气而增损之，谓桂能治血以推动其毒，扶阳益气以充达周身。血内泣，引之出表，则气从内托；血外散，引之归根，则气从外护。参、耆非桂引导，不能独树其功。桂不得甘草和平气血，亦不能绪其条理，要非寡闻浅见者能窥

其万一也。四君中不用白术，避其燥，不用茯苓，恐其渗也。用桂而不用四物者，以芎之辛散，归之湿润，芍之酸寒，地黄之泥滞故耳。如宜升则加升柴，宜燥加苓术，宜润加当归，宜利气加陈皮，宜收加芍，宜散加芎。又表实去耆，里实去参，中满忌甘，内热除桂，斯又当理会矣。

〔按〕元气者，太虚之气也。人得之则藏乎肾，为先天之气，即所谓生气之原，肾间动气者是也。生化于脾，为后天之气，即所谓水谷入胃，其精气行于脉中之营气，其悍气行于脉外之卫气者是也。若夫合先后而言，即大气之积于胸中，司呼吸、通内外，周流一身，顷刻无间之宗气者是也。总之，诸气随所在而得名，实一元气也。保元者，保守此元气之谓。是方用黄耆保在外一切之气，甘草保在中一切之气，人参保上、中、下、内、外一切之气，诸气治而元气足矣。然此汤补后天水谷之气则有余，生先天命门之气则不足，加肉桂以鼓肾间动气，斯为备耳。

四君子汤 治面色痿白，言语轻微，四肢无力，脉来虚弱者。若内伤虚热，或饮食难化作酸，须加炮姜。

人参 白术 茯苓 甘草各二钱

加姜、枣，水煎服。

加木香、藿香、葛根，为七味白术散。

加陈皮，为五味异功散。

加陈皮、半夏，为六君子汤。

加藿香、砂仁，为香砂六君子汤。

〔集注〕张璐曰：气虚者，补之以甘，参、术、苓、草，甘温益胃，有健运之功，具冲和之德，故为君子。盖人之一生，以胃气为本，胃气旺则五藏受荫，胃气伤则百病丛生。故凡病久虚不

愈，诸药不效者，惟有益胃、补肾两途。故用四君子，随证加减，无论寒热补泻，先培中土，使药气四达，则周身之机运流通，水谷之精微敷布，何患其药之不效哉！是知四君子为司命之本也。

吴琨曰：夫面色痿白，则望之而知其气虚矣。言语轻微，则闻之而知其气虚矣。四肢无力，则问之而知其气虚矣。脉来虚弱，则切之而知其气虚矣。如是则宜补气。是方也，四药皆甘温，甘得中之味，温得中之气，犹之不偏不倚之人，故名君子。本方加木香、藿香、葛根名七味白术散，治小儿脾虚肌热，泄泻作渴。以木藿之芳香、佐四君入脾，其功更捷；以葛根甘寒，直走阳明，解肌热而除渴也。

〔按〕本方加陈皮，名五味异功散，治气虚而兼气滞者；再加半夏，名六君子汤，治气虚而兼痰饮者；再加砂仁、藿香，名香砂六君子汤，治气虚而兼呕吐者。此皆补中有消导之意也。

香砂六君子汤 治气虚痰饮，呕吐痞闷，脾胃不和，变生诸证者。

人参一钱 白术二钱 茯苓二钱 甘草七分 陈皮八分 半夏一钱 砂仁八分 木香七分

上生姜二钱，水煎服。

〔集注〕柯琴曰：经曰：壮者气行则愈，怯者著而为病。盖人在气交之中，因气而生，而生气总以胃气为本。若脾胃一有不和，则气便著滞，或痞闷嘔呕，或生痰留饮，因而不思饮食，肌肉消瘦，诸证蜂起，而形消气息矣。四君子气分之总方也，人参致冲和之气，白术培中宫，茯苓清治节，甘草调五藏，胃气既治，病安从来。然拨乱反正，又不能无为而治，必举大行气之品以辅之，则补者不至泥而不行。故加陈皮以利肺金之逆气，半夏以疏脾土之湿气，而痰饮可除也；加木香以行三焦之

滞气，缩砂以通脾肾之元气，而臍郁可开也。君得四辅，则功力倍宣，四辅奉君，则元气大振，相得而益彰矣。

当归补血汤 治男妇血虚似白虎证，肌热面赤，烦渴引饮，脉来洪大而虚，重按则微。

当归二钱 黄耆一两

水煎服。

〔集注〕吴琨曰：血实则身凉，血虚则身热，或以饥困劳役虚其阴血，则阳独治，故诸证生焉。此证纯象白虎，但脉大而虚，非大而实为辨耳。《内经》所谓脉虚、血虚是也。五味之中，惟甘能补，当归味甘而厚，味厚则补血；黄耆味甘而薄，味薄则补气。今黄耆多数倍，而云补血者，以有形之血不能自生，生于无形之气故也。经言，阳生阴长，是之谓耳。

佛手散 治妊娠胎动下血，或因伤动，子死腹中，下血疼痛，口噤欲死。服此探之，不损则痛止，已损则立下。及横生倒生，交骨不开，产后血晕昏乱，崩中金疮，去血过多等证。

当归二两或三两 川芎一两

上剉粗末合均，每服五钱，水一盞，酒半盞，煎八分，热服。未效再服。

加败龟版一具，梳发一团，名开骨散。

〔注〕命名不曰归芎，而曰佛手者，谓此方治妇人胎前、产后诸疾，如佛手之神妙也。当归、川芎为血分之主药，性温而味甘辛，以温能和血，甘能补血，辛能散血也。古人俱必以当归君川芎，或一倍或再倍者，盖以川芎辛窜，捷于升散，过则伤气，故寇宗奭曰：不可单服、久服，亦此义也。然施之于气郁血

凝，无不奏效，故用以佐当归而收血病之功，使瘀去新生，血各有所归也。血既有所归，则血安其部，而诸血病愈矣。至妊娠胎动，胎伤下血，非血壅胎伤，即血乱妄下。服此以探之，血乱胎未动者，血顺则痛止，血壅胎未损者，血行痛止，则胎因之而安也；已动已损者，血得顺行，则胎亦因之而顺下也。横生倒生，因用力太早，或误服催生之药，致气逆血乱，亦用此以调之。产后崩中金疮，亡血昏冒，亦用此以补之。子死腹中，腹痛欲死，亦用此以逐之。已上诸病，皆血病而气不虚者也。若夫气虚难产，产后血脱，唇面黄白，少气烦乱，动则昏冒，若误与此，反致立败，则必倍加人参，速固无形之气，以救有形之血也。至于交骨难开，加龟版、梳发，下输阴道；寒加姜、桂，热加黄耆，汗加桂枝，搐加荆穗，又当以意消息、加减可也。

四物汤 治一切血虚、血热、血燥诸证。

当归 熟地各三钱 川芎一钱五分 白芍(酒炒)二钱
上四味，水煎服。

[集注]张璐曰：四物为阴血受病之专剂，非调补真阴之的方。方书咸谓四物补阴，遂以治阴虚发热，火炎失血等证，蒙害至今。又专事女科者，咸以此汤随证漫加风、食、痰、气等药，纷然杂出，其最可恨者，不辨热之虚实，率加知母、黄柏，令人久服，而庸工利其有劫病之能，咸乐用之。殊不知四君子气药，治上下失血过多，一切血药置而不用，独推独参汤，童便以固其脱者，以有形之血，不能速生，无形之气，所当急固也。昔人有言，见血休治血，必先调其气。又云，四物汤不得补气药，不能成阳生阴长之功。诚哉言也！然此汤伤寒火邪解后，余热留于血分，至夜微热不除，或合柴胡，或加桂枝，靡不应手辄效，不可没其功也。

柯琴曰：经云：心生血，肝藏血。故凡生血者，则究之于心；调血者，当求之于肝也。是方乃肝经调血之专剂，非心经生血之主方也。当归甘温和血，川芎辛温活血，芍药酸寒敛血，地黄甘平补血。四物具生长收藏之用，故能使营气安行经隧也。若血虚加参耆，血结加桃仁、红花，血闭加大黄、芒硝，血寒加桂、附，血热加芩、连，欲行血去芍，欲止血去芎，随所利而行之，则又不必拘拘于四矣。若妇人数脱其血，故用以调经种子。如遇血崩、血晕等证，四物不能骤补，而反助其滑脱，则又当补气生血，助阳生阴长之理。盖此方能补有形之血于平时，不能生无形之血于仓卒，能调阴中之血，而不能培真阴之本，为血分立法，不专为女科套剂也。王好古治妇女，不论内伤、外感、胎前、产后，随证加二味于四物中，名曰六合，未免任意牵强。

圣愈汤 治一切失血过多，阴亏气弱，烦热作渴，睡卧不宁等证。

四物汤加人参、黄耆（一方去芍药），
上水煎服。

〔集注〕柯琴曰：经云：阴在内，阳之守也；阳在外，阴之使也。故阳中无阴，谓之孤阳；阴中无阳，谓之死阴。朱震亨曰：四物皆阴，行天地闭塞之令，非长养万物者也。故四物加知柏，久服便能绝孕，谓嫌于无阳耳。此方取参、耆配四物，以治阴虚血脱等证。盖阴阳互为其根，阴虚则阳无所附，所以烦热燥渴；气血相为表里，血脱则气无所归，所以睡卧不宁。然阴虚无骤补之法，计在培阴以藏阳，血脱有生血之机，必先补气，此阳生阴长，血随气行之理也。故曰：阴虚则无气，无气则死矣。此方得仲景白虎加人参之义而扩充者乎。前辈治阴虚，

用八珍、十全，卒不获效者，因甘草之甘，不达下焦，白术之燥，不利肾阴，茯苓渗泄，碍乎生升，肉桂辛热，动其虚火。此六味皆醇厚和平而滋润，服之则气血疏通，内外调和，合于圣度矣。

地骨皮饮 治阴虚火旺，骨蒸发热，日静夜剧者；妇人热入血室，胎前发热者。

四物汤加 地骨皮 牡丹皮_{各三钱}
水煎服。

〔集注〕柯琴曰：阴虚者阳往乘之，发热也。当分三阴而治之。阳邪乘入太阴脾部，当补中益气以升举之，清阳复位而火自熄也。若乘入少阴肾部，当六味地黄丸以对待之，壮水之主而火自平也。乘入厥阴肝部，当地骨皮饮以凉补之，血有所藏而火自安也。四物汤为肝家滋阴调血之剂，加地骨皮清志中之火以安肾，补其母也；加牡丹皮清神中之火以凉心，泻其子也。二皮凉而不润，但清肝火不伤脾胃，与四物加知柏之湿润而苦寒者不同也。故逍遥散治肝火之郁于本藏者也，木郁达之，顺其性也；地骨皮饮，治阳邪之乘于肝藏者也，客者除之，勿纵寇以遗患也。二方皆肝家得力之剂。

犀角地黄汤 治热伤吐衄、便血，妇人血崩、赤淋。

生犀角 生地黄 白芍 牡丹皮

上四味，先用三物水煎，去滓，入生犀汁，热服。

〔注〕吐血之因有三：曰劳伤，曰努伤，曰热伤。劳伤以理损为主，努伤以去瘀为主，热伤以清热为主。热伤阳络则吐衄，热伤阴络则下血。是汤治热伤也，故用犀角清心去火之本，生地凉血以生新血，白芍敛血止血妄行，丹皮破血以逐其

瘀。此方虽曰清火，而实滋阴；虽曰止血，而实去瘀。瘀去新生，阴滋火熄，可为探本穷源之法也。若心火独盛，则加黄芩、黄连以泻热；血瘀胸痛，则加大黄、桃仁以逐瘀也。

四生丸 治阳盛阴虚，血热妄行，或吐或衄者。

生地黄 生柏叶 生荷叶 生艾叶 各等分

上四味，捣烂为丸，如鸡子大，每服一丸，滚汤化服。

〔集注〕柯琴曰：阴虚而阳无所附，则火炎上焦；阳盛则阳络伤，故血上溢于口鼻也。凡草木之性，生者凉，而熟之则温；熟者补，而生者泻。四味皆清寒之品，尽取其生者，而捣烂为丸，所以全其水气，不经火煮，更远于火令矣。生地多膏，清心肾而通血脉之源。柏叶西指，清肺金而调营卫之气。艾叶芳香，入脾胃而擅去瘀生新之权。荷叶法震，入肝家而和藏血摄血之用。五志之火既清，五藏之阴安堵，则阴平阳秘，而血归经矣。是方也，可暂用以遏妄行之热血，如多用则反伤营。盖血得寒，则瘀血不散，而新血不生也。设但知清火凉血，而不用归脾、养荣等剂以善其后，鲜有不绵连岁月而毙者。非立法之不善，妄用者之过耳。

当归六黄汤 治阴虚有火，令人盗汗者。

当归 生地 熟地 黄耆 黄芩 黄连 黄柏

上水煎服。

〔注〕寤而汗出曰自汗，寐而汗出曰盗汗。阴盛则阳虚不能外固，故自汗。阳盛则阴虚不能中守，故盗汗。若阴阳平和之人，卫气昼则行阳而寤，夜则行阴而寐，阴阳既济，病安从来？惟阴虚有火之人，寐则卫气行阴，阴虚不能济阳，阳火因盛而

争于阴，故阴液失守外走而汗出，寤则卫气复行出于表，阴得以静，故汗止矣。用当归以养液，二地以滋阴，令阴液得其养也。用黄芩泻上焦火，黄连泻中焦火，黄柏泻下焦火，令三火得其平也。又于诸寒药中加黄耆，庸者不知，以为赘品，且谓阳盛者不宜，抑知其妙义正在于此耶！盖阳争于阴，汗出营虚，则卫亦随之而虚。故倍加黄耆者，一以完已虚之表，一以固未定之阴。经曰：阴平阳秘，精神乃治。此之谓欤！

〔集注〕吴琨曰：杂证盗汗，与伤寒盗汗不同。伤寒是半表半里之邪未尽，杂证则阴虚有火而已。彼以和表为主，此以救阴为急。故以补阴之品，佐泻火之药，明者辨之。

黄耆建中汤 治虚劳里急，悸、衄、腹中痛，夜梦失精，四肢痠痛，手足烦热，咽干口燥，诸不足诸证。

黄耆 胶饴 白芍 甘草 桂枝 生姜 大枣

上七味，水煎服。

〔集注〕喻昌曰：虚劳而至于亡血、失精，津液枯竭，难为力矣！《内经》于针砭所莫治者，调以甘药，《金匱》遵之而立黄耆建中汤，急建其中气，俾饮食增而津液旺，以至充血生精，而复其真阴之不足。但用稼穡作甘之本味，而酸辛咸苦在所不用，盖舍此别无良法也。然用法贵立于无过之地，不独呕家不可用建中之甘，即微觉气滞，更当虑甘药太过，令人中满也。至大建中则大建其中之阳，小建中则小小建立之义，理中则燮理之义，治中则分治之义，补中、温中，何莫非先中州之义。缘伤寒外邪逼入于内，法难尽用，仲景但于方首以“小”之一字，微示其意，至《金匱》始尽建中之义。后人引伸触类，制乐令建中汤、十四味建中汤，曲畅建中之旨。学者心手之间，所当会